



## SIARAN MEDIA

## Pembangunan Usahawan Veteran ATM: LTAT Meluncurkan Program Pemerkasaan Usahawan Wira

**KUALA LUMPUR, 25 NOVEMBER 2024** – Lembaga Tabung Angkatan Tentera ("LTAT") hari ini meluncurkan Program Pemerkasaan Usahawan Wira LTAT 2024/2025 ("PPUW"), sebuah inisiatif yang julung kali dilaksanakan untuk memperkasakan pembangunan sosio-ekonomi veteran Angkatan Tentera Malaysia ("ATM"). Program ini, yang menawarkan bimbingan keusahawanan berstruktur kepada usahawan veteran, diluncurkan secara rasmi oleh Timbalan Menteri Pertahanan, Yang Berhormat Tuan Haji Adly bin Zahari.

Program ini direka untuk membantu para veteran dan keluarga mereka mencapai kelestarian kewangan jangka panjang. Ia merupakan sebahagian daripada usaha berterusan Kementerian Pertahanan dan LTAT bagi membina ekosistem yang lebih inklusif serta mampan khusus untuk veteran ATM.

"Ikhtiar ini adalah sejajar dengan aspirasi Ekonomi MADANI yang menitikberatkan kesejahteraan holistik rakyat Malaysia khususnya kepada para wira-wirawati negara selepas bersara. Selain itu, program ini merupakan bukti, komitmen dan keprihatinan LTAT untuk memperkasa ekonomi warga veteran ATM yang telah banyak berkorban demi kedaulatan Malaysia." kata YB Tuan Haji Adly bin Zahari, Timbalan Menteri Pertahanan.

En. Mohammad Ashraf Md. Radzi, Ketua Eksekutif LTAT, menambah, "LTAT memandang serius terhadap mandat yang diamanahkan selaku sebuah institusi yang bertanggungjawab untuk memperkuuhkan jaringan perlindungan sosio-ekonomi anggota ATM. Di samping memastikan pemberian dividen yang mampan, komitmen LTAT diterjemahkan menerusi pelaksanaan pelbagai program berimpak tinggi demi menyokong aspirasi Kementerian Pertahanan. Usaha ini merupakan manifestasi keikhlasan LTAT dalam memastikan masa depan yang lebih mampan bagi para pencarum."

LTAT menjalankan kerjasama strategik dengan People Systems Consultancy ("PSC"), pakar latihan keusahawanan yang telah melatih lebih 100,000 peserta dimana lebih 70% berjaya meningkatkan pendapatan mereka di dalam jangka masa tiga bulan. Program perintis bersama LTAT ini menyasarkan seramai 35 usahawan veteran B40. Sepanjang tempoh enam bulan, peserta akan mengikuti program pembangunan kapasiti yang komprehensif, merangkumi modul latihan keusahawanan bersepadu, sesi bimbingan mentor-mentee, pembelajaran dalam talian, dan penguasaan literasi kewangan.

Bertunjangkan visi Ekonomi MADANI dan agenda strategik GEAR-uP, LTAT terus memperkuuh komitmennya. Selain PPUW, inisiatif-inisiatif lain di bawah kerangka Ekonomi MADANI oleh LTAT, termasuk program modul literasi kewangan, dan peluang penempatan kerjaya kedua melalui Perbadanan Hal Ehwal Bekas Angkatan Tentera ("PERHEBAT"), terus memainkan peranan penting dalam membentuk sistem sokongan yang komprehensif untuk komuniti ATM.

**-TAMAT-**

#### **Tentang LTAT**

Ditubuhkan pada bulan Ogos 1972 di bawah Akta Tabung Angkatan Tentera 1973 (juga dikenali sebagai Akta 101), LTAT merupakan sebuah institusi badan berkanun yang menyediakan kemudahan Skim Simpanan Persaraan kepada para Pegawai dan anggota lain-lain pangkat Angkatan Tentera Malaysia (ATM) serta pesara tentera. Terbaru, Akta Tabung Angkatan Tentera 1973 telah diumumkan pindaannya pada 1 November 2022.

#### **Tentang People Systems Consultancy**

People Systems Consultancy ("PSC") adalah sebuah perusahaan sosial komited untuk memperkasakan komuniti dan memacu transformasi lestari di lapan negara. Dengan menggunakan metodologi yang terbukti berkesan, PSC telah berjaya transformasi lebih daripada 100,000 orang dari seluruh rantau Asia Tenggara, dengan 70% daripada mereka berjaya mencapai peningkatan pendapatan dengan mampan. Dengan tumpuan yang menyeluruh untuk meningkatkan taraf hidup komuniti kurang bernasib baik, PSC memberikan impak yang lebih bermakna dan mampan, mengukuhkan peranannya sebagai pemangkin bagi kemajuan sosio-ekonomi dan pertumbuhan inklusif. Untuk maklumat lanjut, sila layari [peoplesystemsconsultancy.com](http://peoplesystemsconsultancy.com).

#### **PERHUBUNGAN MEDIA**

**Izzat Alhadjri**

**Pengarah,**

**Ketua Komunikasi Strategik**

E-mel : [izzat.alhadjri@ltat.gov.my](mailto:izzat.alhadjri@ltat.gov.my)

No. Tel : +603- 4815 8888

Laman web : [www.ltat.gov.my](http://www.ltat.gov.my)